

# PAULO LIWAKATETIGI TITO

Tito eledi micataga daga lionigi Paulo leegodi eledi yaxawa me nakato Goniotagodi. (Awiniteloco 1.4). Tito ida aneetege noiigi greegotedi, codaa me yaxawa Paulo nigijo me diniwajetibece me yelogoditedibece nibodicetedi anele aneetece Cristo. (Awiniteloco Gálatas 2.3; 2 Coríntios 2.13; 7.6,13; 8.16-18,23). Paulo idiaa yoya Tito minitaga lidelogo-nelegi Creta me yaxawa loiigi Cristo ane nigeladimigipitigi nigini lidelogo. (Awiniteloco 1.5).

Paulo didikotibige Tito me iladeetema codaa me ibodicaxitema anodaagee libakedi me nowienogodi loiigi Cristo, codaa me diigaxinagatece Cristo, codaa midioka limedi meo anele. Paulo iigaxitece Tito anodaagee me iolaticoace lacilodi loiigi Cristo, eledi yalagata ane leeditibige me ee lewiga nigina laxokodipi, iwaalepodi, lionekadi, codaa me notagipi. Yalagata anodaagee godewiga nigijo jotigide, codaa anodaagee Aneotedogoji Liwigo me iigi godewiga. Nogowidijedi lotaga Paulo yalagata me leeditibige loiigi Cristo me dinaxawatiwage.

## Paulo didikotibige Tito

**1** <sup>1</sup>Ee Paulo, ane ee liotagi Aneotedogoji, codaa me ee liigexegi Jesus Cristo. Aneotedogoji idiomagaditedice, oada idimonya me jao me ili eliwigatanegegi nigina oko Aneotedogoji liomagataka me nepilidi, codaa me jaxawatiogi nigidi Aneotedogoji liomagatagipi moyowoogodi niginoa niigaxinaganegeco anewi, ane nikeetogowa anejinaga me godewigatema Aneotedogoji ane yemaa. <sup>2</sup>Nigida anejinaga me godewiga joanigidaa ane yemaa Aneotedogoji mejinaga nigina me inibeonagatibigege midioka limedi me idejonaga miniwataga anigida noko. Aneotedogoji agodinaale. Anigicatibige daga yoe nigina iigo nagakaagida me ligegitedogowa meote me godewigatace. <sup>3</sup>Nigijo nigicota noko Aneotedogoji ane nibikota, oada ja ikee nigijo ane ligegitedogowa meote, nigijo nogoyelogoditedibece latematiko. Najigotediwa yatematiko ane leeditibige me jatematitedibece. Aneotedogoji ane Gonewikatitogodi jiginiaa idiige me jelogoditedibece latematiko.

<sup>4</sup>Tito, jiwakateetibigagaji nagadi notaganagaxi idie, leegodi idejigotagawa micataga degewi makaami ionigi, igaataga eliodi me gadaxawani mepaanaga iwagati Goniotagodi, digo aneji mejiwagadi Goniotagodi.

Jemaa Aneotedogoji Godiodi iniaa Goniotagodi Jesus Cristo ane Gonewikatitogodi midioka limedi meletagadomi, codaa midioka limedi metigadiwikodeni, codaa magaga owo gadaalegena mele.

**Ica libakedi Tito minitaga ica lidelogo-nelegi ane liboonagadi Creta**

<sup>5</sup>Idiaagadoyaa minitaga lidelogo Creta jaotibige magoti ane gobakedi, codaa me iomagatiticoace niginoa goneleegiwadi baanaga yaxogotibigiwaji me lacilodi Goniotagodi loiigi idiwatawece nigotadi. Codaa genaga jelogoditagawa anodaagee me ixipeniticoace nigicoa goneleegiwadi. <sup>6</sup>Nigicoa goneleegiwadi ane lacilo Goniotagodi loiigi leeditibige me nigina goneleegiwa ane digica anoyakaditece anigetigida libatiigi aneo moyakadi moditeloco. Leeditibige mokaantece lodawa, codaa leeditibige lionigipi magaga oyiwigadi Goniotagodi, codaa me minigina ane dinajacagadi, codaa minigina anoyiwigadi eliododipi.

<sup>7</sup>Igaataga nigina goneleegiwa ane dowediteloco Goniotagodi loiigi leeditibige me digica ane yakadi mee mida libatiigi. Nigina oko ayakadi diginigina anagaxakenegegi, otegeaagaga yakadi minigina ane daga leegitibige me deligide, otegeaagaga acipegegi, otegeaagaga idelegegi, otegeaagaga adodigomadaga. <sup>8</sup>Pida leeditibige me nigina goneleegiwa ane yemaatibigo me dibatege oko anicoticogi ligeladi, codaa minigina ane yemaa inokina anele, codaa leeditibige minigina anele me dowooko, codaa me igenaga, ane doletibige minioka yewigatema Aneotedogoji, codaa me dinajacagadi. <sup>9</sup>Nigicoa goneleegiwadi leeditibige moyotete codaa moyiwigadi nigijoa natematiko ane jakataga me jinakatonaga, nigijoa natematiko ane itege nigijoa niigaxinaganegeco gotiwigatakanegegi. Odaa nigidiwa goneleegiwadi oyakadi moyoniciwigadieledi oko eliwagatakanegegi nigina moyelogodita niginoa niigaxinaganegeco anewi, codaa moyakadi moikeetiogi libatico nigidi ane dogoyemaateda niigaxinaganegeco anewi.

<sup>10</sup>Igaataga eliodi oko ane dogoyemaa moyiwigadi niginoa lacilodi loiigi Goniotagodi, otegeaagaga niigaxinaganegeco gotiwigatakanegegi agoyiwigadi. Odaa oninaaletiniwaceeledi oko nigina me niigaxinaganaga. Liwigotigi nigijo ane niigaxinaganaga idiwa judeutedi. Nigidiwa judeutedi jegepaanaga notigimadaga agoyemaa moyiwigadi nigijoa lacilodi loiigi Goniotagodi. <sup>11</sup>Nigidi oko ane dogoyiwigadi niginoa lacilodi leeditibige me amakenitiniwace, igaataga jogoibeyacagadi eliwagatakanegegi eliodi dinoiigiwepodi nigina modiigaxinagatece ane degewi. Nigidiwa niigaxinaganadi idokowotibige modinigaanyetece dinyeelo, codaa nigida lowoogo goboliga. <sup>12</sup>Liwigotigi nigijo noiigitigi Creta, ini goneleegiwa anidiaagelatibige. Nigidi noiigi odiletibige nigini goneleegiwa degewi me yelogoditedibece icoa lowooko noenogododi. Ijaagijo nigijo goneleegiwa mee, “Yoiigi digoina Creta idokee mawitakaga, liciagi niginoa eijedi ane doide, nigojigipi codaa dagaxa maniodagaxadi.”

<sup>13</sup>Niginoa lotaga nigijo goneleegiwa ewi. Joanigidaa leegodi me leeditibige mawiceni motaganegeni nigidi noiigi, amaleegaga oyakadi mepaanaga oyiwagadi Goniotagodi. <sup>14</sup>Codaa oxokitigi me dagaleegowajipata natematigigi jotigide laamipi judeutedi, otegexaagaga najoinaganegeco ane icogoticogi mijoataga goneleegiwadi ane dogodibatege niigaxinaganegeco anewi.

<sup>15</sup>Pida nigina oko ane yapidi laalegena yeligo okanicodaagica niweenigi, igaataga yowoogodi Aneotedogoji me ikatetece me yeligo okanicodaagica niweenigi. Pida nigina oko ane napioi laalegena, codaa ane daga nakatoteda Goniotagodi, nigini oko diletibige daatigica gaantokaagini ane yapiditema. Igaataga iniaagini deemitece laalegena mini lapioyagajegi, codaa lowooko meletidi napioi. <sup>16</sup>Nigidi oko modi moyowoogodi Aneotedogoji, pida nigida ane lewiga ikee me dogoyowoogoditeda Aneotedogoji. Aneotedogoji lelegetedipi nigidi noiigi. Agoyiwagadi Aneotedogoji, codaa agica nimawenegegi dogowo gaantokaagini loenatagi anele.

### Niigaxinaganegeco anewi

**2** <sup>1</sup>Pida akamagakaami Tito, leeditibige me iigaxinaganitece nigica ane daga eetege niigaxinaganegeco anewi. <sup>2</sup>Iigaxini niginoa goneleegiwadi laxokodipi me daga nacipaga, codaa niginaeledi oko leeditibige modeemitetibige anee me newiga, codaa ele moibake lixakedi nigina me nowookonaga, codaa leeditibige midioka limedi modioteci niigaxinaganegeco gotiwagatakanegegi, codaa leeditibige midioka limedi moyemaaeledi gonioxoadipi, codaa leeditibige modinatitalo niginoa ane dakaketema. <sup>3</sup>Iigaxini nigina iwaalepodi laxokodipi me leeditibige anee me newiga me ikee minioka oyewigatema Aneotedogoji. Leeditibige me daga beyagi modotagatibigeeledi oko, codaa me daga nacipaga. Codaa leeditibige modiigaxinagatece anele. <sup>4</sup>Lajo mowo loniciwaga nigijo iwaalepodi bagalee nojitibigiwaji me daga nacipaga, codaa mewi moyemaa lodawadi inaa lionigipi. <sup>5</sup>Eledi lajo magaga owo loniciwaga me dinajacagaditibigiwaji, codaa minoka oyowo nigica anele, codaa meletemaeledi oko, codaa mele me doweditologo ligelatedi, codaa moyiwagadi lodawadi. Nige nigidaagee me newiga, odaa agica oko ane yakadi me beyagi me dotagatibige Aneotedogoji lotaga.

<sup>6</sup>Idaagemiitigi magaga anajoinitiniwace nigijo bagalee lionekadi modinajacagaditema lidagataka lolaadi. <sup>7</sup>Akamagakaami leeditibige makaami niwinigijegi amaleegaga niginaeledi oko oyakadi monowiigotagawa leegodi gadoenataka anele. Nigina me iigaxinaganitece niigaxinaganegeco gotiwagatakanegegi, jinagaloo, otegexaagaga acide, pida leeditibige madinaniwagati. <sup>8</sup>Nigina me iigaxinagani, enitece notaga ane igenaga amaleegaga agica oko ane yakadi me ee me abataa, codaa me gadaxakawepodi niboligatibigiwaji leegodi me digica ane yakadi moyatigi ligegi modakapetogogi.

<sup>9</sup>Anajoinitiniwace nigina niotagipi moyiwagadi niotagodepodi, codaa modoletibige mowo me ninitibigiwaji niotagododi leegodi mele mowo

libaketedi. Leeditibige me dogodinotigimadetege niginoa niotagododi modiojotece. <sup>10</sup>Leeditibige nigina niotagipi me dogodoliceta ane nebi niotagododi. Pida leeditibige moikeetiogi nigidi eledi oko moyakadi monakato, amaleegaga nigina oko odeemitetibige niigaxinaganegeco aneetece Aneotedogoji ane Gonewikatitogodi.

<sup>11</sup>Igaataga Aneotedogoji ja nikeetedogowa meletetema inatawece oko. Joanigidaa leegodi me ikee me yemaa meote me newigatace inatawece oko. <sup>12</sup>Leegodi Aneotedogoji eliodi meletedogodomi, odaa godiigaxitetece me degele me godewiga me digica me jaogate Aneotedogoji. Godiigaxitetece me jikanaga nigijoa lidagataka ane beyagi nigina okotigi nigina iigo, codaa me idinajacagatagatema lidagataka godolaadi, codaa me jaoga ane igenaga, codaa me jeemiteegatibige Aneotedogoji malee godewigateloce nigina iigo. <sup>13</sup>Aneotedogoji godiigaxi maleeginaagejonagatice digoina iigo leeditibige me inibeonagatetege nigica noko libinienigi nige dinikee meliodi loniciwaga Gonoenogodi nelegi ane Gonewikatitogodi, Jesus Cristo. <sup>14</sup>Iniaaginiwa Jesus Cristo dinajigo me yeletedogodomi, eotedibige me yedia nigica ane lica loojedi me godogatedicogi inoatawece gobeyacegeco, codaa me godapitagadi, codaa meote moko nigina anida aneetetege, codaa me dinoniciwagaditibigiwaji moyoe nigica anele.

<sup>15</sup>Tito, leeditibige midioka limedi me iigaxinaganitece nigijoa anejitedagawa. Abakeni ganagatetigi nigina moniciwagati laalegena, codaa moxoki oko ane wajipatagawa. Jinigikani degetigadomilenitice, micataga daaditaga akaamita goneleegiwa gonegegi.

### Ica anodaagee lewiga nigina anodinagakatiditalo Goniotagodi

**3** <sup>1</sup>Tito, awii nigina oko monalagatibige me leeditibige moyiwagadi niginoa lacilodi idiaa nigijo anida nagatetigiteloce digoina iigo. Leeditibige me eniwagatakanaga, codaa me nigomaga mowote inoatawece anele. <sup>2</sup>Leeditibige me daga beyagi modotagatibige eledi oko, otegeaxagaga odinotigimadetege eledi oko. Pida nigina oko leeditibige meletema nigina iwikodadipi, codaa me diniwikodetibigiwaji lodoe inatawece oko. <sup>3</sup>Igaataga nigijo jotigide okomogoko agica degele me jowookonaga, otegeaxagaga ejiwagataga Aneotedogoji, otegeaxagaga niginoa aninoa nagatetico, codaa oko ninaalexegi. Jiwagatece niginoa lidagataka godolaadi ane beyagi, codaa joleegatibige inokina me jalooga. Nigijo jotigide joleegatibige me jaoga ane beyagitema eledi oko, codaa oko oceegaga. Nigijo oko agetigodema, codaa oko ajinemaanagatiniwace.

<sup>4-5</sup>Pida nigijo naga nikeetedogowa Aneotedogoji ane Gonewikatitogodi midioka limedi meote aneliodi meletogodomi, codaa me godema, odaa jegeote me godewigatace. Ageote me godewigatace daga leegodi niginoa okomaga godoenataka anele, pida leegodi me godiwikode. Liwigo Aneotedogoji yapitagadi godaalegena, codaa najigotogowa gela godewiga. <sup>6</sup>Leegodi Aneotedogoji midioka limedi meote ane dagaxa meletogodomi, niwakatee Liwigo me godajacagadi. Niwakatee Liwigo leegodi nigijo aneotedogodomi Jesus

Cristo ane Gonewikatitogodi. <sup>7</sup>Jigidaagee, leegodi Aneotedogoji me dagaxa meletedogodomi, eote me godegenaga, odaa ja dibatedogogi. Odaa leegodi moko lionigipi jakataga me inibeonagatege midioka limedi me idejonagate miniwataga agaleegica liniogo. <sup>8</sup>Odaa jakataga me jinakatonaga niginoa notaga.

Jemaa midioka limedi me iigaxinaganitece nigijoa notaga amaleegaga nigina oko anonakato Aneotedogoji midioka limedi me dinoniciwagaditibigiwaji mowote loenataka anele. Ele mowo nigida anejita, odaa ja yaxawa inataweceeledi oko. <sup>9</sup>Pida otonitice nigina majipaata modinotigimadetigi niginoa ane degeleteda, nigina modinotigimadetigi liboonagatedi jotigide laamipi, codaa nigina modinotigimadetigi odaa ja nidelaga leegodi nigica ane diitigi nigijoa lajoinaganegeco Moisés. Nigina midagaae me dinotigimade, agica ane yaxawa, codaa agica aneletema. <sup>10</sup>Nigina oko anidioka limedi me doletibige me dinotigimadetegeeledi oko, leeditibige mitoataale mawii leemidi. Nige daga yemaa me wajipatagawa, odaa jinagaleegica mawii. <sup>11</sup>Igaataga jogowoogoti me dagadiaagica ganimawenegegi maxawani nigini oko meo me igenaga lewiga. Nigida libeyacegegi aneo ikee me nilaagedi.

### Owidijedi najoinaganegeco

<sup>12</sup>Nigina me jimonyatagawa Ártemas, mige Tíquico, awii gadoniciwaga managi meetaga, jakapagatiwage manitaga nigotaga Nicópolis, igaataga ja yowoogo midiaagejo nige limedi niwetaga. <sup>13</sup>Awii nigica anakati maxawanitece Zenas, nigijo ane dideletibigogoji me dotaga lodoe goniwinogodi, codaa axawani Apolo, amaleegaga agica ane yopotibige nige diniwiaje. <sup>14</sup>Leeditibige me inatawece loiigi Cristo diniigaxitece me dinoniciwagadi midioka limedi mowo nigica anele, codaa moyaxawa ane yopotibige moyaxawa, codaa agele dogoyaagadi noko mowo ane degele.

<sup>15</sup>Inatawece aninaa meetaga oyecoaditibigagaji. Ee jemaa me idecoaditece nigina anetigodemaa, anoyiwagadi Goniotagodi.

Jemaa Aneotedogoji midioka limedi meletedagadomi akaamitawecetiwaji. Odaa jigidaagee.